



Intun vilaç des bandis di Luxor, intal antîc Egjit, al vîf Min, puar, cence un braç e vedran, e al tire indenant a la buine. Ven a stâi che il Faraon, Ramses II, vënt barufât cuntun Re vicin, e vënti declarât vuere, al à bisugne di ducj i oms dal Egjit, par scombatilu. Al burîs fûr un edit e cussî ducj i oms a scuegnin partî par la vuere, lassant feminis e fruts. Min, jessint mutilât nol va e al sta a cjase.

Passe un an e lis feminis aromai a àn pierdût lis sperancis di tornâ a viodi i lôr oms. “Saran ducj muarts” a pensin, e a son disperadis. La vuere e va pes lungjis e a passin altris doi agns.

Finide la vuere, i oms a tornin a cjase e ce cjatino? Ni vore di frutins e cetantis feminis inmò plenis. Ur ven sù il fum e invelegnâts come liparis, par prin a jemplin di pachis lis feminis e po a van a cirî Min, che nome lui al podeve vê cumbinât chê malefate.

Lu puartin in place par cjastiâlu e intal imprim a volin copâlu, po a si contentin di taiâi l'imprest che al à cussî ben doprât, in lôr assence.

Min, puar, cumò al è plui invalid di prin, ma al è content di istès, par ce che al à vût, nome par lui, un harem che nancje chel dal Faraon al jere cussî ben furnît.

Pe sô vicende Min al passe a la storie e al ven venerât in dut l'Egjit, come il Diu da la fertilitât.

P.S.: Se o vês la ocasion di passâ par Luxor, in Egjit, jentrait tal templi di Karnak e a mieç templi, a man drete, suntun mûr o viodarês la storie di Min. Se po o vês cualchi probleme a

lei i jeroglifics, nuie pôre, lis vuidis dal puest par cualchi euro a saran ben contentis di tradusiju par voaltris.

di Pauli Jacuss